

Inatsisartut suleriaasianni § 36 naapertorlugu oqaluuserisassatut siunnersuut imattoq saqqummiunneqarsimavoq:

Kalaalimernit inuiattut ilisarnaatigalugit nerisassaa-titta niuertarfinni akiisa apparsarneqarnissaat pillugu apeqquteqaat aallaavigalugu oqallisissiaq.

(Inatsisartunut ilaasortaq Isak Hammond, Inuit Ataqatigiit)

Akissuteqaat

(Inuussutissarsiornermut Suliffeqarnermullu Naalakkersuisoq)

Inatsisartunut ilaasortaq Isak Hammond-ip kalaalimerngit niuertarfinni akikillineqarnissaat pillugu apeqquteqaat tunngavigalugu oqallittoqarnissaanik siunnersuuteqarpoq.

Aallaqqaammut hr. Hammond taamatut oqallittoqarnissaanik siunnersuuteqarsimaneranik qutsavigissavara, Naalakkersuisummi pingaartilliunnarmassuk innuttaaqatitta kalaaliminernik pissarsisinnaanerisa pitsaanerpaamik qulakteerneqarnissaa.

Siunnersuuteqartup siunnersuutaar marlunnik apeqquteqaatitaqarpoq, taakkulu immikkoortillugit akissavakka. Siulleq kalaalimerngit niuertarfinni akiinut apeqqut, tullia pisortat suliffeqarfiini kalaaliminernik atuisarnernut apeqqut.

Kalaaliminertorsinnaanerup inuiaqtigiinnut pingaaruteqarneranik Hr. Hammondip oqarnera Naalakkersuisunit isumaqtigilluinnarparput. Pingaartumik utoqqartavut kalaaliminernik salliuutitsillutik nerisaqartarput.

Pissutsilli imaapput, kalaalimerngit akiisa niuernermi pissutsit malittarpaat, tassalu nioqqutissat tuniniarneqartartut allat assigalugit tuniniarneqartut taakkulu piumaneqarnerat naapertorlugit akilersorneqartarlutik. Assersuutigalugu nipsat suaat pisarineqartut pisisussanut sanilliullugit amerlavallaarpata, akit appassapput. Suaalli tuniniarneqartut ikinneruppata, akii qaffasinnerussapput. Taamaattumik apeqquteqaat tunngavigalugu oqallinnissamik siunnersuuteqartup siunnersuutigisaatut akileraartarnermut inatsit aqutigalugu akit aqunneqartalersinnaanissaat ajornakusuussaaq, akileraarutip qaffasinnera appasinneraluuunniit kalaalimerngit pisiarineqarsinnaasut amerlassusaanut attuummassuteqanngimmata.

Nioqqutissat nunatsinnut eqqunneqartartut akitsuusersornerisigut “kalaalimerngit akisoqisut” akiisa appariarsinnaanissaanik isumaliortarneq aqqutissaanngilaq, tamatumami kinguneriinnassammagu nerisassat tamarmik akitsoiarnerinik, tamannalu kissaatiginartinneqarunangilaq.

Naalakkersuisut massakuugallartoq pilersaaruteqanngillat inatsisit aqutigalugit nerisassanik nioqquteqartartut nioqqutigisaminnik qanoq akeqartitsinissaanik kinguneqartussanik aalajangersaassallutik. Killilersugaangitsumik unammilleqatigiinneq aqutigalugu niuertut pisisartut akiliutigiumasaannit annertunerusumik akeqartitsisinnaanerat killilerneqartarpooq.

Taamaasiortoqneratigut kikkut tamarmik kalaalimerngut nalinginik pissarseqataasarpus. Piniartut aalisartullu tunisaminnit akissarsisarput, niuertut iluanaaruteqartarpus, pisisartullu nioqqutissat nalinganit annertunerusumik akiiluteqartannginnermikkut pissarseqataasarlutik.

Nieuertut kalaaliminernut akigititaminnik appartitsinissaanik naalakkiuteqarnikkut nioqqutissat tamakku iluanaaruteqarfiusumik pissarsissutigisarnissaat periarfissaarutsinnejarsinnaavoq, tamatumalu kingunerisaanik niuertut kalaaliminernik nioqquteqarnissaminnut piumassuseerutsinnejarsinnaallutik.

Pissutsit ima ilisinnaapput, soorlu mattaat pisiniarfanni akiisa apparitinnejarnissaat naalakkiutigineqarnerisigut niuertunut tuniniarnissa imminut akilersinnaajunnaarluni, pisiarinerani akit appartinnerat namminneq kisimik isumagisassanngortinneqarneratigut tuniniarnissa imminut akilersinnaajunaassamat, tassami, siunnersuuteqartup eqqortumik oqarneratut, aalisartunut piniartunullu tunisinermi akit apeqqusissannginnatsigik. Tamatuma kingunerisinnaavaa arferit mikisut angisuullu mattaasa pisiarineqarsinnaajunnaarnerat, Naalakkersuisullu isumaat naapertorlugu tamanna kialluunniit soqtigisarisinnaanngilaa.

Piniartut pisaminnik tunisaqarsinnaanerat Suliffeqarfiiit inuussutissaleriffiusut pillugit Namminersornerullutik oqartussat nalunaarutaat nr. 21, 27. juni 1998-imeersukkut maleruagassiuuneqarnikuuvoq. Nalunaarummi tassani § 2-mi allassimavoq piniartut pisaminnik tunisaqarsinnaanerisa saniatigut “atuisartunut” taamaallaat tunisaqarsinnaasut takku “nerisassiuussisarfittut, neriniartarfittut, nerisaqartitsivittut assigisaatulluunniit” nalunaarsorneqarsimatillugit.

Tamatuma kingunerisaanik pisiniarfiiit nerisassanik nioqquteqartartut kalaaliminernik suliffeqarfinit inuussutissaleriffittut akuerisaasunit (AGF) taamaallaat pisisinnaatitaapput, imaluunniit piniartunit Aalisarnermut, Piniarnermut Nunalerinermullu Naalakkersuisoqarfiiup ataani Uumasut Nakorsaanit akuerineqarsimasunit. Piniarfiiit nerisassanik nioqquteqartartut taamaallaat akunnermuliuttoqarlutik pisisinnaajuartillugit, tamanna akititaasunut sunniuteqartuassaaq.

Tamatuma saniatigut Naalakkersuisut ilisimatitsissutigisinnaavaat Aalisarnermut, Piniarnermut Nunalerinermullu Naalakkersuisoqarfik 2011-imi ukiukkulli pisiniarfiiit nerisassanik nioqquteqartartut, piniartut, tunitsiviit meeqqueriviillu suleqatigalugit “akit qaffasinnerinut” patsisaasut mississorniarsarisimammagit, ilutigalugu misissorneqarluni pisuussutit uumassusillit sumiiffii, tamakkulu tunitsivinnut sineriammi avinngarussimaqalutik inissisimasunut tunineqarsinnaanerinut periarfissat.

Tamanna tunngavigalugu Aalisarnermut, Piniarnermut Nunalerinermullu Naalakkersuisoqarfiiup meeqqueriviit kalaaliminernik atuisarnerinut tunngasunik misissuilluni aallartippoq, misissuinerlu 2012-imi juni naammassisangatinneqarpoq.

Naalakkersuisut soorunalimi kaammatuutigerusuppaat pisortat paaqqutarinnittarfiini kalaaliminernik sapinngisamik nerisitsisoqartarnissaa. Kalaaliminernik atuinerulernikkut niuernikkut oqimaaqatigiisitsisarnermut, avatangiisinut, aalisartunut piniartunullu iluaqutaassaaq.

Apeqqu tip pissanganartup oqallisigineqarnissa Naalakkersuisut qilanaaraat.